

23 APR 2001

MAHATHIR-RMK8 (SEKTOR)

SEKTOR PEMBUATAN, PERTANIAN DAN PERKHIDMATAN PENYUMBANG UTAMA

KUALA LUMPUR, 23 April (Bernama) -- Datuk Seri Dr Mahathir Mohamad berkata sektor pembuatan, pertanian dan perkhidmatan akan terus menjadi penyumbang utama kepada pertumbuhan ekonomi dalam tempoh Rancangan Malaysia Ke-Lapan (RMK-8).

Perdana Menteri berkata sektor pembuatan dijangka berkembang pada kadar purata 8.9 peratus setahun dan sumbangannya kepada Keluaran Dalam Negara asar (KDNK) meningkat kepada 35.8 peratus pada tahun 2005.

"Momentum pertumbuhan sektor pembuatan akan terus dikekalkan melalui pembangunan industri yang berkeupayaan memenuhi permintaan pengguna yang semakin kompleks, membentuk pakatan strategik dan membangunkan kelompok industri yang dinamik, katanya ketika membentangkan Rancangan Malaysia Kelapan bagi tempoh 2001-2005 di Dewan Rakyat di sini hari ni.

Katanya, pemindahan teknologi serta peningkatan aktiviti penyelidikan dan pembangunan (R&D) dijangka dapat membentuk lebih banyak rantai yang kukuh antara perusahaan besar dengan perusahaan kecil dan sederhana, dan dengan itu dapat mengukuhkan lagi pertumbuhan sektor pembuatan.

Menurutnya, pembangunan hiliran produk bernilai ditambah yang tinggi bagi industri berasaskan sumber terutamanya industri petrokimia, farmaseutikal serta keluaran kayu, getah dan keluaran makanan dijangka menambah sumbangannya kepada peningkatan keupayaan tempatan serta daya saing sektor pembuatan.

Pada masa yang sama, industri keluaran elektrik dan elektronik akan dipelbagai untuk mengeluarkan barangan berteknologi tinggi bagi memenuhi permintaan pasaran dunia.

Dr Mahathir juga berkata adalah penting untuk memodenkan sektor pertanian dan meningkatkan sumbangannya kepada ekonomi negara di bawah RMK-8.

Bagi mencapai hasrat itu, katanya, pendekatan bersepadu yang melibatkan perubahan yang ketara seperti menggantikan amalan penanaman satu jenis tanaman di kebun-kebun kecil kepada tanaman campuran serta menggunakan teknologi terkini secara meluas dalam proses pengeluaran dan melaksanakan strategi pemasaran yang dinamik perlu dilaksanakan.

Walaupun teras keseluruhan adalah untuk mempergiatkan semula sektor berkenaan, usaha yang bersungguh-sungguh akan diambil bagi meningkatkan taraf hidup petani dan pekebun kecil melalui perladangan yang lebih teratur dan produktif, katanya.

"Kita jangan sekali-kali lupa tentang kepentingan strategik sektor ini memandangkan ia merupakan pembekal makanan kepada negara dan bahan mentah untuk sektor pembuatan."

Langkah baru perlu digubal dan dilaksana untuk meningkatkan pengeluaran dan produktiviti serta menyumbang kepada penambahan pendapatan petani dan pekebun kecil, kata beliau.

Di samping usaha meningkatkan pengeluaran makanan, sumber pertumbuhan baru seperti buluh, rotan, bunga-bunga, herba, tumbuhan ubat-ubatan dan ikan hiasan akan digalakkan, kata Dr Mahathir.

Katanya, pengeluaran komoditi industri akan disusun semula dan diperkukuhkan untuk memastikan bekalan bahan mentah bagi kegunaan industri berasaskan sumber serta meningkatkan rantai dengan sektor lain dalam ekonomi negara.

Perdana Menteri berkata pertanian juga perlu diusahakan dengan tertib dan berjadual seperti dalam industri pembuatan dan pekerjaan di pejabat.

Bagaimanapun, beliau berkata usaha kerajaan sahaja tidak mencukupi sekiranya tidak dilengkapi dengan penyertaan aktif petani, pekebun kecil dan nelayan serta golongan lain dalam sektor swasta bagi mempercepatkan proses perubahan sektor ini.

"Kita perlu terima dan guna secara bersungguh-sungguh teknologi baru, menyatu dan menggabungkan tanah yang kecil kepada saiz yang lebih ekonomik yang membolehkan penggunaan jentera untuk mempertingkatkan produktiviti serta mengurangkan input buruh dan kos pengeluaran," katanya.

Pekebun kecil dan estet perlu menerima kepelbagaian aktiviti mereka dengan mengusaha tanaman lain yang berpotensi termasuk pokok kayu yang sesuai untuk balak yang telah dikenalpasti dan melibatkan diri dalam industri berasaskan sumber untuk meningkatkan pendapatan.

Menurutnya, kerajaan sememangnya peka dan prihatin tentang keperitan dan kesusahan yang dihadapi oleh pekebun kecil kesan daripada kemerosotan harga kelapa sawit dan getah dari semasa ke semasa.

Sebagai langkah segera, kerajaan baru-baru ini telah menyediakan bantuan khas kepada pekebun kecil kelapa sawit dan getah.

Bagaimanapun, pekebun kecil tidak harus bergantung kepada bantuan subsidi tetapi sebaliknya hendaklah mempertingkatkan pendapatan melalui perubahan.

Dr Mahathir berkata sektor perkhidmatan pula dijangka berkembang sebanyak 7.7 peratus dalam tempoh RMK-8 dan tiga sektor kecil utama yang dijangka mencapai pertumbuhan yang lebih tinggi adalah pengangkutan, penyimpanan dan komunikasi; kewangan, insurans, hartanah dan perkhidmatan perniagaan; serta sektor kecil perdagangan borong dan runcit, hotel dan restoran.

Sektor kecil perdagangan borong dan runcit, hotel dan restoran akan dirangsang oleh peningkatan pendapatan yang boleh dibelanja serta usaha bersepadu untuk menjadikan Malaysia sebagai destinasi pelancong dan pusat membeli-belah utama.

Usaha ini termasuklah menjadi tuan rumah acara sukan utama, mempromosikan Malaysia sebagai pusat utama untuk mesyuarat, persidangan dan pameran serta menganjur aktiviti yang berdasarkan peristiwa di sepanjang tahun, kata beliau.

Perdana Menteri berkata usaha juga akan dilaksana bagi mempromosikan pelancongan dalam negeri terutamanya untuk mengambil peluang cuti dua hari Sabtu setiap bulan. -- BERNAMA

MKO OS